

**Incumbensa da la fracziun da la PPS concernent in credit spezial per in'offensiva da digitalisaziun per rinforzar il lieu economic e per promover la digitalisaziun**

Nossa societad fa actualmain tras ina midada che n'è anc mai stada uschè cumplexsiva – almain betg en quest tempo. La digitalisaziun vegn discutada dapertut. La digitalisaziun pretenda extremamain bler da nossa economia, ma er da noss sistem da furmaziun. Per dumagnar las sfidas che naschan da quai ston vegnir mess a disposiziun meds finanzials da l'economia, ma er dal stadi. Noss president dal cussegl grond ha renvià en ses pled d'avertura da la sessiun d'avrigl 2018 en moda impressiunanta e cun blers exempels e cun bleras pussaivladads a quests fatgs.

Noss chantun vischin Son Gagl vegn probablamain a metter a disposiziun 75 milliuns francs per ina tala offensiva da furmaziun per la tecnologia d'infurmaziun. En quest connex vegn il chantun Son Gagl probablamain a surpigliar la rolla da pionier. Ma er per il chantun Grischun sa porschan fitg bunas schanzas en quest champ. Ma il basegn d'agir è ussa fitg urgent.

Il quint dal chantun Grischun ha serrà l'onn 2017 puspè cun in surpli pli aut e nunspetgà. Quai en spezial pervia da vendas d'acziun betg urgentas e pervia d'ina quota nunspetgadain auta da la taglia anticipada sco er pervia d'in pajament supplementar da la banca naziunala svizra. Quai èn tut facturs externs che dastgan vegnir resguardads mo sco prestaziun unicis.

Igl è ussa però temp d'investir quests surplus directamain ed unicamain en projects raschunavels e da duvrar ina part da quests meds finanzials intenziunadamain per promover il Grischun sco lieu da l'economia e da la furmaziun. Impurtant en quest connex èsi che quests daners vegnian duvrads mo per ina finanziaziun da partenza. I fiss fauss d'investir quests daners en projects che genereschan gronds custs periodics.

La fracziun da la PPS incumbensescha la regenza da stgaffir las basas legalas e da sutmetter al cussegl grond ina missiva correspondentia per in'offensiva da digitalisaziun sin tut ils stgalims. Tar l'elavuraziun sto – per il bain da tuttas duas varts – vegnir tschertgada ina collavuraziun pli stretga cun Son Gagl, e quai en spezial en il sector da las scolas autas. Il model Grischun sto però tegnair spezialmain quint er da las scolas primaras e dal ferm sistem da furmaziun dual. Las mesiras correspondentas duain vegnir finanziadas sur in credit general da 39 milliuns francs (50 % dals surplus dal quint 2017) e star a disposiziun – en il senn d'ina finanziaziun da partenza – per maximalmain 8 onns.

Cuira, ils 16 d'avrigl 2018

**Koch (Igis)**, Brandenburger, Davaz, Hug, Mathis, Nay, Salis, Toutsch, Weber